

天一閣藏明代方志選刊續編

天一閣藏
明代方志選刊
續編

PDG

崇禎吳縣志二（江蘇）

天一閣藏明代方志選刊續編
二六

上海書店

吳縣志卷之十一

祥異

冠災民
變附

自古惟風雨順序祝融效靈民生其間衣完食足修其
孝弟忠信若災沴洊仍兵燹耗亂天札疵厲歲不勝書
則民生維艱矣爲政者可徒徼於氣數謂遼渺而不可
知哉

漢

惠帝五年辛亥夏大旱太湖涸冬雷桃李花

元鼎二年丙寅三月大雨雪

始元元年乙未七月大雨至十月

元康二年丁巳五月大疫

建武十四年戊戌大疫死者萬計

永平八年乙丑秋大水

永元五年癸巳大旱蝗

永初元年丁未十二月地震大水大風雨雹

興平中吳中童謠曰黃金車斑斕耳闔閭門出天子後孫權

遂以黃龍元年建吳國

三國

黃武四年乙巳地震

嘉禾六年丁巳地震

太平元年丙子八月朔大風潮溢平地水深八尺古木拔盡

天冊元年乙未城中掘地得銀尺長一尺廣三分上刻有年

月字大赦改元

晉

太康四年癸卯冬大水

元康五年乙卯夏水

○八年戊午秋水

永嘉元年丁卯縣民萬祥婢生子鳥頭兩足馬蹄一手無尾
黃色大如枕

○五年辛未縣民張林家狗作人言天下人餓死

太興二年己卯縣境無麥無禾民大饑米廩無故自壞

咸康元年乙未六月大旱民饑斗米值五百錢人相鬻

○七年辛丑縣境水連理太守王恬以聞

建元元年癸卯災風

咸安二年壬申大旱饑

咸安初狗嘗夜聚臯橋上吠聲甚衆人往視見一狗兩二頭

皆前向亂吠

元興元年壬寅四月大饑戶口減半

晉時縣境一山崩山一石鼓扣之無聲張華云可以蜀中桐木刻作魚形擊之則鳴如其言果聲聞數里

宋

元嘉二年乙丑西洞庭華山寺池中生千葉白蓮花

○七年庚午十一月太湖水溢

○十二年乙亥六月大水民饑斗米錢三百

大明二年戊戌白雀產城中太守王翼之獻於朝

大○八年甲辰冬米貴錢百餘市米一升餓死者十六七

齊

永明九年辛未大水民饑

梁

天監四年乙酉歲大稔斛米三十錢

中大通二年庚戌大旱

大寶元年庚午旱蝗大饑人相食

陳

太建中大水

隋

開皇二十年庚申十一月地震

大業十三年丁丑十一月有大星北來磨拂竹木皆有光飛
至城下墮地時劉元進舉兵據郡見而惡之令掘地得一
右徑丈餘

唐

貞觀三年己丑秋大水

武后長安元年乙亥地震

乾元元年戊戌大水

大曆元年丙午水災

貞元六年庚午夏大旱井泉竭人疫死者衆

○八年壬申大水

永貞元年乙酉秋旱

元和十二年丁酉大 Water 害稼

長慶二年壬寅大雨太湖水溢平地乘舟

○四年甲辰秋太湖決溢大水

寶曆元年乙巳旱

太和三年己酉六月大 Water 害稼

○四年庚戌自春至夏大水傷麥無稼

○六年壬子水災大疫

○七年癸丑秋大水傷稼

會昌元年辛酉七月大水

大中元年丁卯西洞庭桃花塢鑿井得天王像

咸通中有異鳥來棲山林四目三足其鳴曰羅平

乾符三年丙申五月旱

天○六年己亥三月不雨大旱至秋收時忽生田鼠夜出食

穀殆盡

中和三年癸卯有聲如轉磨無雲而雨是謂天隕泣

天復三年癸亥三月大雪平地三尺其氣如烟其味苦十二

月大雪湖冰

至道中甘露降於瑞光禪院時有白龜見合歡芍藥雙竹知

大州陳省華以四瑞聞於朝

天祐元年甲子九月行冬令大風寒復大雪

宋

淳化中連年水災

大中祥符四年太湖溢壞民廬

乾興元年壬戌五月大水傷禾

天聖元年癸亥大水無稼湖田生聖米饑民取以爲食

○四年丙寅九月雨水壞廬舍

景祐初大水

寶元元年戊寅大荒饑

慶曆中歲大饑

皇祐二年庚寅大水

○三年辛卯秋大饑

○五年癸巳夏旱蝗秋大稔

皇祐間民間墻壁以白堊書在字數萬家無一遺者雖寤寐
隱僻之處皆遍

熙寧八年乙卯夏大旱太湖水退數里內見有古丘墓街衢
井竈田無稼民大饑

元豐元年戊午七月四日夜大風雨水高一丈餘漂蕩塘岸
洗滌橋梁沙土俱盡惟石僅存

○四年辛酉七月大風駕湖水漂沒民居傷稼

○五年壬戌大雨太湖水溢

元祐六年辛未六月大雨高低田皆巨浸全無稼民饑死者

數萬餘人

○九年甲戌九月二十一日地震有聲

紹聖三年丙子自夏迄秋地震

○四年丁丑夏旱

元符二年己卯六月大雨傷稼

大觀元年丁亥八月水災

政和元年辛卯八月霖雨不止傷稼

政和初州學中有一立石終夜放光學官上其事於州知州
盛章因作瑞石放光頌奏達朝廷一夕大成殿雷擊其

柱火光燭天東壁楣上遺一四帶青布巾大可貯五斗粟
學官以香案置之中庭詰旦視之無有

○五年乙未八月水災

重和元年戊戌五月霖雨渰沒民田

靖康中歲大饑

建炎三年己酉大旱無秋

○四年庚戌夏大疫斗米錢五百○二月二十四日金兀
朮來犯忽自盤門入劫掠官府民居子女金帛廩庫縱火
延燒烟焰見二百里凡六晝夜始出闔門士民得脫者十

二三而遷避不及遭殺者五十餘萬而西南隅一帶尤爲
丘墟時將郭仲威乘賊勢荼毒燒劫之餘又縱兵晝夜搜
搶民有訪舊居者卽執之窮問瘞藏民益冤憤有自賊逃
歸者多困饑驟得食而死橫尸枕籍道路涇港不可勝計
哭聲震天自昔喪亂未有如是之酷烈仲威出自寇盜號
郭大力後被王德擒送行在斬於平江以謝百姓

紹興二年壬子春米貴斗值千錢大饑時軍餉緊急民生益
艱

○三年癸丑八月地震自西北來樹木搖動